

足本
蘇子由全集

大東書

元

卷十七 表記劉子狀共十四首

元祐七年生日謝表二首

臣輟言伏蒙聖恩以臣生日特遣中使降詔書賜臣羊酒米麵者與聞幾政每懷尸祿之憂時及初生曲蒙
好賜之厚使華臨貴親族增榮臣輟誠惶誠恐頓首頓首伏念臣起自畎畝之微貧無錙石之積永念屬厭之戒
曾無求飽之心迨玷近班適緣乏使不稱是懼如醉其憂豈意生育之期復煩慶賜之重此蓋伏遇皇帝陛下政
本於惠禮從其隆萬物盛多如魚麗之時羣臣和樂有鹿鳴之喜斥餘辜以爲饋助燕私而不忘自顧何功敢竊
大烹之養普將圖報少逃素食之譏臣無任感天荷聖激切屏營之至謹奉表稱謝以聞

臣某言伏蒙聖恩以臣生日特遣中使降詔書賜臣羊酒米麵者孤矢之祥永記於生育庖廩之賜曲被於
渙恩祇荷寵靈豈勝愧懼臣輟誠惶誠恐頓首頓首伏念臣少方志學曾蒙藿之莫辭長欲事親愧旨甘之不贍
雖居近列之寵常懷罔極之悲顧乏遠謀猥叨亟饋此蓋伏遇太皇太后陛下約於奉已侈在養賢躬周公吐哺
之勞服大禹惡酒之戒特推觴豆之賜以助室家之私敢不下酌民言助調國政庶無覆餗之患以圖報德之方
臣無任感天荷聖激切屏營之至謹奉表稱謝以聞

笏記

臣伏蒙聖慈以臣生日特遣中使降詔書賜臣羊酒米麵者獲貳文昌再經生育薦蒙慶賜之典仰承慈惠

之風食浮於人念素餐之可愧任過其量無令德之足觀欲報之心未知所措臣無任感天荷聖激切屏營之至

元祐八年生日謝表二首

臣職言伏蒙聖恩以臣生日特遣中使降詔書賜臣羊酒米麵者老逢誕日泣養親之無從賜出天廚愧君恩之莫報臣職誠惶誠恐頓首頓首伏念臣生於窮陋晚被寵榮粗飯垢衣未改生平之舊嘉肴旨酒每驚日食之豐復緣載育之辰曲霑馭幸之典室家交慶心口自慙此蓋伏遇皇帝陛下儉以約身優於養士救庠人而繼粟閔褐父之睨威力行舊章以惠列辟德非易物澤配漏泉矧茲異數之隆非復周行之比食無避難敢忘臣子之心志在屬厭更誦古人之戒臣無任感天荷聖激切屏營之至謹奉表稱謝以聞

臣職言伏蒙聖恩以臣生日特遣中使降詔書賜臣羊酒米麵者惠以餽牽示同安於飽滿繼之黜黜思共享於和平臣職誠惶誠恐頓首頓首伏念臣生自寒鄉幼被慈訓父篤教忠之義母有擇隣之風孤苦積年衰罷無用每逢生日私竊疚懷敢期老病之餘獲霑好賜之末既醉且飽兼喜與悲此蓋伏遇太皇太后陛下知臣下之劬勞散庠庖之充積謂獎或不以而周雅作刺食每無餘而秦風變衰霑爲大亨度越前世蓋視如手足俾知體貌之隆况門有桑蓬本效馳驅之用欲圖報德誓以移忠臣無任感天荷聖激切屏營之至謹奉表稱謝以聞

笏記

臣伏蒙聖慈以臣生日特遣中使降詔書賜臣羊酒米麵者在蒙寄任空閑歲時每遇初生輒被好賜醉酒飽德雖喜太平之風鳴野食莘未展盡心之報臣無任感天荷聖激切屏營之至

辭門下侍郎劄子

臣竊觀今日內降聖旨：「臣轉官除門下侍郎。」伏以執政近臣，預聞國論，可用才舉，難以次遷；苟以先後歲月爲倫，必致忝冒沉淪之議。况臣頃由縣道擢寔從官，首尾七年，歷盡華實，逮居丞轄之地，訖無絲髮之功。黽勉逾年，慙負填臆，敢期聖眷未已，擢任愈隆。臣反覆思之，始者旣以不次度越衆賢，今者又因見任遷貳元宰，前後僥倖，豈可常然？苟復冒居出納之司，不知進退之分，公論不允，必致顛隳。况臣久以愚拙，誤蒙矜憫，幸今命出未下，勢尙可同，伏乞聖恩，念臣孤危，非有矯飾，特寢明命，以安微衷。臣無任祈天螯命，激切屏營之至，取進止。

免太中大夫門下侍郎表二首

臣輟言伏奉告命，蒙恩除臣太中大夫守門下侍郎者，久塵右轄，無補於時；進貳東臺，有慙在列，言莫宣於誠意，聽未感於高明。臣輟誠惶誠懼，頓首頓首。伏念臣頃以虛名，誤蒙收錄，旋塵近侍，非有勞能，咀嚙文詞，本腐儒之事業；彈治邪枉，犯衆口之憎嫌。及夫進貳文昌，日侍軒闥，隨衆出入，得失何補於萬幾？奉行文書，勉強自慙者期歲。此則聖主之所親見，孤臣之所自知，豈待人言難逃天鑒，敢謂超升累級，復進崇階？雖用負乘，行自招於寇盜，未嘗狩獵，食何取於鶉鷔？伏望太皇太后陛下，因功以舉賢，選衆以拔士，采其譽者，必考其實；聽其言者，皆原其心。如臣空疎，自難隱伏，特進成命，以慰公言，使聖朝無失於用人，則臣愚若蒙於厚賜，臣無任祈天螯命，激切屏營之至，謹奉表陳免以聞。

臣輟言伏奉告命，蒙恩除臣太中大夫守門下侍郎者，喉吻之任，密侍於禁中，綸綍之行，風傳於海內，苟用人之失，當於累上以非輕。臣輟誠惶誠懼，頓首頓首。伏念臣西南陋儒，墳、樸學，非有過人之大節，惟守事君之小心，無不實不敢居其名，非其任不敢竊其祿。任歷三世，年逾半生，奉以周旋，未始失墜。今者乃欲以尋尺之材，居棟梁之任，以斗升之量，受鐘鼎之藏，雖欲欺君，且非本志。矧復躡等超累級之上，遷秩非舊比之常，靖言以思，

未見其可。伏望皇帝陛下，因任庶物，照臨百官，短長各盡其宜，大小無失所養，必其力有餘而後用，則其任逾久而常新。抑將多士，皆賴以安，豈惟微臣獨被其賜？愚衷已竭，天聽尙同，臣無任祈天竣命，激切屏營之至。謹奉表陳免以聞。

謝太中大夫門下侍郎表二首

臣轍言：伏奉制命，除臣太中大夫守門下侍郎，再具詞免，蒙降批荅不許，仍斷來章者。黃闥之崇，惟賢是用；四品之貴，匪功弗加。自慙迂拙之餘，併荷寵光之及。臣轍誠惶誠恐，頓首頓首。伏惟太皇太后陛下，政由家出，德與性成，盡心與民，雖萬鍾無愛於國，潔身由義，雖一毫未嘗取人，惟至清故大臣小吏不察而盡知，惟至公故貴戚近習不戒而自飭。臣每因雙日，獲覲清光，嘗恐病癘不中於規模，固陋難逃於冰鑑，方欲仰干聰聽，少避衆賢，敢謂未見瑕疵，尙加進擢，豈以其拙直無欺罔之過，而遲鈍少狂躁之心，致此誤恩，濫於末品？此蓋伏遇太皇太后陛下，人非求備，志在養賢，將欲因鮑以致營生，尊隗以招樂子，拔十觀五人之用，累百求一鶚之精，廣而不遺，多故致難，臣敢不仰體聖意，旁求哲人，旣以寬寤寐之久勞，亦以救空疏之不逮，過此以往，未知所裁。臣無任感天荷聖，激切屏營之至。謹奉表稱謝以聞。

臣轍言：伏奉制命，除臣太中大夫守門下侍郎，再具詞免，蒙降批荅不允，仍斷來章者。掌轄逾年，何補六曹之劇？納言置貳，仍忝一階之崇。雖曰次遷，要爲非據。臣轍誠惶誠恐，頓首頓首。竊以臣之事君，理先審己，器小受大，有滿溢之禍；力薄任重，有顛覆之虞。臣世本寒微，技止文墨，向者翔翔翰苑，才殫於書詔之間；總執臺綱，力盡於議論之際；至於參陪大政，實匪其人。久爾冒居，日深愧畏，未能謀遠，常恐見譏於匹夫；有若發蒙，何以折衝於下國？方知難而欲退，偶進擢之非常，貪戀恩榮，已乖行意之義。願瞻中外，豈無鬱鬱德之人？徒以天聽甚高，異命已

發，循牆雖切，反汗無緣。上累朝廷知人之明，下愧朋友責善之實。此蓋伏遇皇帝陛下，游神淵默，灼見羣臣之情，運智密微，陰扶聖母之斷。人惟求舊，德用日新。念臣嘉祐之直言，仕亦既久；識臣建元之司諫，心則無邪。忘其鄙凡，日加親近，身非木石，猶有圖報之心。恩隆父兄，當驗服勤之效；臣無任感天荷聖，激切屏營之至。謹奉表稱謝以聞。

進郊祀慶成詩狀

右臣伏觀今月十四日，親饗郊廟，禮成肆赦者。恭以莫大之儀，成於一日；無窮之澤，施及四時。歡聲所同，和氣畢應。伏惟皇帝陛下，奉烈祖之成憲，蹈父母之訓言。臨御七年，慎守一德。人服孝慈之化，物知仁厚之德。神祇降休，麥禾薦熟。長日既至，舊章不忘。以爲再饗明堂，未暇圓邱之大祀；躬謁皇地，久稽先農之遺訓。惕然不寧，而非作是用。修合祭之舊，補不講之文。人情所安，神意昭答。况復肆膏之令，一寬於夏；頒已責之期，大弛於冬。施仁於不報之地，收福於無求之中。臣每侍清光，略聞大旨，勉強吟咏，形容盛明。愧周顒二后之遺詩，乏東顧三禮之廣麗。圖寫天日，自知難成。間雜風謠，猶或有取。謹賦皇帝郊祀慶成詩一首，謹繕寫隨狀上進。輒冒宸嚴，臣無任慙懼激切之至。謹進。

免南郊加恩表二首

臣輟言伏奉詔命，以郊祀禮畢，特加臣護軍，進封開國伯，食邑五百戶，食實封二百戶者。幸以空疎，獲陪元祀，敢祈恩霈，下逮無功。臣輟誠惶誠恐，頓首頓首。恭以三年而郊，百禮咸至。上則六聖德澤，洋溢於無盡；下則四方奔走，勞苦而不辭。鳩工聚財，講禮修器，經涉累歲，克舉舊儀。斯皆恭儉足以感神，仁聖足以服衆。故得事舉如

素禮成不違。其於左右之臣，豈有纖芥之助？今當寧之美，以謙而弗居；相祀之勞，雖微而咸錄。苟不知避，將何以安伏望太皇太后陛下，上屈至恩，俛從私欲，使無勞者不得受賜，而辭寵者獲遂本心。體天地無私之明，厲臣下有取之節，聽聽雖遠，懇誠必聞。臣無任祈天殫命，激切屏營之至。謹奉表陳免以聞。

臣輦言伏奉誥命，以郊祀禮畢，特加臣護軍，進封開國伯，食邑五百戶，食實封二百戶者，叨陪祀事，已極忻榮，貪冒寵光，實增愧畏。臣輦誠惶誠恐，頓首頓首。恭以皇帝陛下，紹統六聖，臨政七年，愛敬盡於事親，故道要而用博，終始念於典學，故德修而弗知。間者稽參古今，並享天地，人情既協，神理弗違。月朔以還，雨雪猶作，齋宿之際，風霾未除，及夫晝漏盡而天宇肅清，月幾望而雲物晏燦，執玉而進，如將弗勝，受福以歸，謙不自有，衆庶如堵，歡忻一詞。此則聖性得於自然，臣下望而莫及。曾何誤寵，橫及無勞？伏望皇帝陛下，狗固請之誠，收已行之命，福昨既均，於在列名，器豈宜以假人？益慎子孫之權，深厲廉恥之節，眇然微願，冀在必從。臣無任祈天殫命，激切屏營之至。謹奉表陳免以聞。

謝南郊加恩表二首

臣輦言伏奉誥命，特加臣護軍，進封開國伯，食邑五百戶，食實封二百戶，尋具表辭免，蒙降批答不許，仍辭來章者。元祀告成，靈貺昭答，推廣乾坤之施，普霑臣子之私，顧惟何勞，竊冒斯寵。臣輦誠惶誠恐，頓首頓首。伏惟太皇太后陛下，母儀三世，坤載四方，享天下之養，而非以厚其身；攬天下之務，而非以私其族。培附帝業，保祐神孫，譬如農夫之養苗，耘鋤以竣其長；玉人之作器，琢磨而望其成。厲之以講學之勤，示之以聽斷之敏，導之事天，而天錫之福；訓之祀地，而地應以和。凡下民所以知戴吾君，皆東朝有以啓迪其意，如臣等輩，絕企光塵，雖復因時以舉儀，祇合以從事參備羽衛，進執蓬豆，豈有勞能坐被光寵？此蓋伏遇太皇太后陛下，因賑膳之餘慶，錄左

右之微勸，以謂承天之休，不可以專享；及物之惠，不嫌於過優；致此誤恩，首霑近列。辭避無所，寢興莫違！臣無任感天荷聖，激切屏營之至。謹奉表稱謝以聞。

臣輟言伏奉詔命，特加臣護軍，進封開國伯，食邑五百戶，食實封二百戶，尋具表辭免，蒙降批答不允，仍斷來章者。祇相元祀，粗免弗度，敢緣均福之常，妄冀及私之寵，重紆訓語，祇益兢慚。臣輟誠惶誠恐，頓首頓首。恭惟郊廟之崇，祖宗所敬，先之以寬刑薄斂，使民罔艱虞，副之以潔粢碩牲，使神無忤怨。民神胥協，家國用寧。顧臣何人，預聞庶政，裕民之意，詔令具存，事神之誠，威儀可效。乃者密侍旒冕，手薦璧琮，辟容穆然，而祇畏之心，明羣工肅然，而吳敖之意，息聽於輿人之誦。知有列聖之風，臣目覩威儀，無周南之嘆，位在近列，有執前之譏，首被恩私，實增戰越。此蓋伏遇皇帝陛下，體二儀之博施，襲累聖之成規，霈然雨露之私，無覆賢愚之間，勳封之錫，深愧於勞臣田邑之加，幾至於成國，功無毫髮，恩積邱山，臣無任感天荷聖，激切屏營之至。謹奉表稱謝以聞。

卷十八 表狀疏共十九首

汝州謝上表

臣輟言伏奉詔命，差知汝州軍州事。臣已於四月二十一日到任上訖者。論事非宜，本慮於大譴，承命出守，猶荷於寬恩。臣輟誠惶誠恐，頓首頓首。伏念臣性本迂愚，學非練達，頃值時乘之始，偶同彙進之餘，由一邑之棲遲，歷九年之僥倖，遍歷侍從，未聞毫髮之勞，久處廟堂，滋見斗筭之陋，疎拙日慙，於君父滿盈，每請於友朋，貪戀寵光，不知引避，愚而自用，言之不疑，寡慮直前，初獨任其狂斐，於時妄作，信自取於顛隤，尚賴深仁，黜臨善地。此蓋伏遇皇帝陛下，堯舜相受，常懷善繼之心，父母兼容，深照不逮之實，稍寬憲法，特許省循，收去幹之魂，雖知甚幸，若喪家之犬，私竊自憐，恐懼未忘，寢興何暇，有民與社，永知愧於明時，使過與愚，冀或收於異日，臣無任瞻天

荷空惶懼戰越之至！謹奉表稱謝以聞。

分司南京到筠州謝表

臣輦言：臣前得罪，蒙恩落職，知汝州。六月十二日，再被告降三官，知袁州。卽治，陸行趨陳留，具舟赴任。九月十日，行至江州彭澤縣界，復被告降，授試少府監分司南京筠州居住，尋拜受前行。於九月二十五日至筠州居住。訖者，愚守一心，漫無趨避，歲更三黜，始悟愆尤。臣輦誠惶誠恐，頓首頓首。伏念臣家傳樸學，仕偶聖時，本無意於功名，徒自勤於翰墨。因時乏使，亟應言事之班，竊食無功，復預聞政之列。纔經九歲，遍歷要塗，人心忌其超遷，天意惡其盈滿，捫心自省，事猶可追。任意直前，罪所從出，惟聞故不明利害，惟拙故不達幾微，以至罪積如山，命輕若髮，薦經彈擊，雖九死以猶輕。黜守幽遐，累千里而爲近。今茲貴分留務，棄置陋邦，不親吏民，許追思其過咎，稍霽祿秩，俾粗免於饑寒。人微固無可言，思深繼之以泣。自違天日，分委泥塗，朝無爲言，思出獨斷，此蓋伏遇皇帝陛下，法天廣覆，配地兼容，雖雷霆之震驚，與雪霜之嚴冽，未始絕物之命。要在厚民之生，故茲賤微，猶得陳述。如臣自處，本復何言？願惟兄弟二人，迭相須爲性命，江嶺異域，恐遂隔於存亡。况復墳墓闕疏，父子離散，若臣家之憂患，實今世之孤窮。靜言思之，誰可告者？惟有自投於君父，庶幾有冀於生全。泣血書詞，叩關仰訴，生有捐軀之日，死存結草之誠。臣無任瞻天望聖，激切屏營之至。謹奉表稱謝以聞。

明堂賀表

臣輦言：伏覩今月十九日赦書，明堂禮畢，大赦天下者。饗帝尊親，古今之大典；推恩肆育，天地之至仁。舉此盛儀，併在今日。臣輦誠歡誠忭，頓首頓首。伏惟皇帝陛下，以仁御世，以誠事天，乾濟坤寧，兵戢民阜，人悅故神罔

不宥物備，故禮得以成；一享圓邱，三謁路寢，誠敬之心，與日兼茂，寬大之澤，靡物不蒙，能事既修，全福自至。方將享堯舜之上壽，膺成康之令名，民願所同，天心是若。臣頃侍帷幄，稍歷歲時，謚責之深，坐甘沒齒，江湖之遠，猶冀首邱，久墊泥塗，聞震雷而惕若，深囚籠檻，得清風而自疑。臣無任瞻天望聖，激切屏營之至。謹奉表稱賀以聞。

雷州謝表

臣職言：臣先蒙恩責降分司南京，筠州居住。於今年閏二月內，又蒙恩責授化州別駕，雷州安置。已於今月五日，至貶所訖者。謫居江外，已閱三年，再斥海濱，通行萬里，罪名既重，威命猶寬。臣職誠惶誠懼，頓首頓首伏念：臣性本朴愚，老益頑鄙，連年驟進，不知盈滿之爲災，臨出妄言，未悟顛危之已至。命微如髮，釁積成山。比者，陸水奔馳，霧雨悉濕，血屬星散，皮骨僅存，身錮陋邦，地窮南服。夷言莫辨，海氣常昏，出有踐蛇茹蠱之憂，處有陽淫陰伏之病，艱虞所迫，性命豈常？念咎之餘，待盡而已。伏惟皇帝陛下，仁齊堯舜，政述祖宗，日月之明，無幽不燭，天地之施，有生共霑。憐臣草木之微，念臣犬馬之舊，未忍視其殞斃，猶復許以生全。臣雖棄捐，尚識恩造，知殺身之何補，但沒齒以無言。臣無任感天荷聖，激切屏營之至。謹奉表稱謝以聞。

移岳州謝狀

得罪南遷，於今七歲，投竄嶺表，又已四年。瘴癘所侵，僅存皮骨，親屬淪喪，生意幾盡，自分必死荒徼，不復歸見中原。豈意聖神御歷，思貸深廣，不遺舊物，尚許北還。元子赦書，重加開宥，事出特旨，恩實再生。臣見具舟前往，自爾稍近華風，遂脫瘴死，君恩至厚，力報無由。臣無任感天荷聖，激切屏營之至。

南郊賀表

臣轍言伏觀今月二十三日，皇帝親饗圓邱，禮成肆赦者，臨御再期，初見上帝，神人交感，德澤旁周。臣轍誠歡誠忭，頓首頓首！伏以本朝六代入聖，承平之久，曠古所未聞。三年一郊，極盛之儀，有唐之成法。因四海來祭之廣，成百神受職之文，推演神休，肆宥多辟，恭惟皇帝陛下，體天地之大德，性堯舜之深仁，受命之符，本緣斯致。御世之道，亦由是隆。復因行禮之終，益廣好生之澤。臣頃斥居荒服，豈意生還，今密邇邦畿，亟聞赦命，造庭稱慶，雖絕望於餘生，鼓腹載歌，竊有幸於今日。臣無任瞻天望聖，踴躍屏營之至。謹奉表稱賀以聞。

降授朝請大夫謝表

臣轍言伏奉告降授朝請大夫，賜紫金魚袋，差遣勳封食實封如故者。罪大恩寬，言者未厭，官高德薄，法所不容，尚領真祠，實出寬憲。臣轍誠惶誠恐，頓首頓首！伏念臣早歷近列，無補明時，下則拙於身謀，上則闇於國體，先朝矜其愚陋，宥以遐荒。前後七年，浮沉萬死，偶真人之御歷，敷大號以惟新，曾復舊官，亟叨厚祿。然臣年迫衰暮，知復何爲？身利退藏，願未敢請，因循於此，黽俛自慙。雖復追創者五官，仍且獲安於閑局，渥恩至厚，爲幸已多。此蓋伏遇皇帝陛下，以堯舜之仁，行成康之政，衷未忘於舊物，恩許畢其餘生。臣謹當杜門躬耕，沒齒蔬食，知成生之難報，姑靜默以待終。臣無任瞻天望聖，激切屏營之至。謹奉表稱謝以聞。

復官宮觀謝表

臣轍言昨於虔州准告授臣濠州團練副使，岳州居住。臣尋乘船至鄂州，復准告授臣大中大夫，提舉鳳翔府上清太平宮外州軍，任便居住。臣已望闕祇受訖者。竊從南方，自分必死，恩移近地，已若再生。復茲舊職之還，仍領真祠之秘，居從私欲，感極涕零。臣轍誠惶誠恐，頓首頓首！伏念臣稟生甚微，處世多難，反身自省，本欲忠孝

於君親；報國何功？粗免愧畏於俯仰；徒以冰炭難於同器，仇怨因而滿前；被以惡名，指爲私黨；將杜其生還之路，遂立爲不赦之文；前後三遷，奔馳萬里，瘴癘纏擾，骨肉喪亡；聞者爲臣傷心，見者爲臣隕涕；雖百夫所聚，公議自明，而衆楚相咻，有口誰訴？此蓋伏遇皇帝陛下，體天地之造，坦然無私，奮堯舜之明，斷然有作，自初踐阼，卽聞德音，內推聖母之慈仁，外照羣臣之情僞，薦垂恩宥，至於再三；春雷發聲，蟄戶咸震，臣得以遲暮，復覩盛明，頃嘗卜居嵩穎之間，粗有伏臘之備，杜門可以卒歲，蔬食可以終身，生當擊壤以詠聖功，死當結草以效誠節；至於陰陽之施，草木何酬？臣無任！

謝復官表二首

屏居田里，忽捧絲綸，恩旨非常，驚喜交至！臣（中謝）伏念臣向者叨塵名位，自取顛隳，亟蒙召歸，卽還舊物之厚；中雖貶奪，不失便地之安；衰老之餘，退藏爲幸；閉門念咎，旣久謝於交遊；沒齒無言，蓋僅同於木石；雖未卽死，豈復干榮？此蓋伏遇皇帝陛下，聖德日新，仁心天覆，躬受八寶，推恩萬方；朝陽一升，雖幽咸照；時雨旣至，靡物不蒙；遂使死灰再然，朽骨重肉；顧臣筋力已憊，不任鞭策之施；耳目俱昏，絕望清明之化；論報無日，荷恩則深；臣無任！

誕膺八寶，承天地之休；連錫二階，均雷雨之施；恩深難報，感極何言？臣（中謝）伏念臣憂患餘生，老病兼至，廢黜雖久，尚霑品秩之餘；奉養雖微，更獲耕耘之助；一毫以上，皆出於君恩；屢歲偷安，有慚於公議；復明寵數，深屬無名；茲蓋伏遇皇帝陛下，天造曲成，聖功獨運，深憐枯槁，重許發生；示人以無私之心，施德於不報之地；臣雖頑鄙，粗識恩私；筋力已衰，莫展馳驅之用；忠誠尚在，豈以死生而移？臣無任！

謝復墳寺表

臣輟言准穎昌府牒准御筆手詔節文應係籍宰執墳寺昨經改正仍並給還者名書罪籍慙負明時思念私學特還舊剏九泉受賜荒隴生光臣輟誠惶誠恐頓首頓首伏念臣早以空疎叨居近密始終無補愚不自量恩禮誤加驟及旣往一被黨人之自上遺先臣之憂舊恩已移沒齒何覲豈謂詔恩一出故物復還邱垓絕芻牧之虞松楸變焦枯之色骨肉感涕閭里咨嗟此蓋伏遇皇帝陛下性仁無私聖孝不匱覽二帝初潛之地動一物失所之懷號令所加存沒咸賴臣衰病已久報恩之日不長子孫在前竭忠之心未替過此以往無所載之臣無任瞻天望聖激切屏營之至謹奉表稱謝以聞

皇太后上仙慰表

臣輟言伏觀今月十四日大行皇太后遺誥至穎昌府者母儀淪喪率土震驚臣輟誠哀誠殞頓首頓首大行皇太后定策艱難之中力辭政務之要功存社稷德及生靈奉諱云初痛心罔極伏惟皇帝陛下方以天下爲養遽有終身之憂孝愛兼隆哀慕日遠臣久居謫籍適此召還感恩至深奉慰無路臣無任瞻望闕庭哀慟殞越之至謹奉表陳慰以聞

欽聖憲肅皇后祔廟慰表

臣輟言伏聞今月二十六日欽聖憲肅皇后神主祔廟禮畢者復土告終祔姑成禮悲動宸極痛徹寰瀛臣輟誠哀誠殞頓首頓首欽聖憲肅皇后內治有光坤元至順方艱難之際好謀而成迨聽斷之辰退藏於密奄棄萬邦之養永嚴七世之祠伏惟皇帝陛下仁孝自天感慕踰等捨曾閔匹夫之志念文武創業之艱深抑誠心以幸天下臣限以在外不獲奔詣闕庭臣無任瞻望摧咽激切屏營之至謹奉表稱慰以聞

欽慈皇后祔廟慰表

臣輦言伏聞今月二十六日欽慈皇后神主祔廟禮畢者。孝不及養。永深敬愛之情。禮極追崇。亟成陵廟之制。臣輦誠哀誠頌。頓首頓首。欽慈皇后統德仁里。作嬪皇家。蚤棄宮闈。未遑禕狄之盛禮。誕育仁聖。克復祖宗之舊章。神人共依。中外追感。伏惟皇帝陛下。孝恭成德。思慕終身。雖盡顯親之儀。未忘念母之志。中外瞻仰。啓處不遑。臣限以在外。不獲奔詣闕庭。臣無任瞻望涕泗。激切屏營之至。謹奉表陳慰以聞。

大行太皇太后上仙功德疏

臣伏以道大難名。本無心於民上。功成卽去。空結想於人間。贊罷襄修。祿陳禕狄。敢薦竺文之秘。少資天福之餘。大行太皇太后。伏願乘佛妙因。稱民善禱。超升彼岸。既資福於今生。降澤斯民。終未忘於故國。臣無任瞻望涕泗。激切屏營之至。謹疏。

皇太后上僊功德疏

右臣伏以仙馭賓天。聖功在物。哀纏率土。痛切遺臣。伏惟大行皇太后。祖烈崇高。坤儀博厚。定立長之大議。宗社以安。避功威而不居。中外咸仰。奄棄東朝之養。倏起西方之遊。易月有期。因山非遠。願假佛乘之妙。少資淨土之因。超三界以無方。福羣生於罔測。臣無任瞻望涕泗。激切屏營之至。謹疏。

哲宗皇帝大祥功德疏

右臣伏以日月有期，祥禪成禮，甫終過密，滋極痛傷！伏惟哲宗皇帝陛下，臨御積年，威神在物，紹聖考之遺業，啓華鄂之遠圖，至矣成功，盡然永慕。爰假佛乘之妙，少資仙馭之遊，伏願追列聖於九霄，齊光斗極，福遺黎於四海，等固山河。臣無任瞻天望聖，激切屏營之至。謹疏。

天寧聖節功德疏

臣伏以地厚天高，取數固多於萬物；堯仁舜孝，降年獨永於百王。理雖出乎自然，事必從乎衆欲。是用假佛乘之至妙，祝宸算之無疆。皇帝陛下，伏願追繼祖宗之隆，度越漢唐之盛，恭儉以求仁，而仁至；愷悌以祈福，而福生。兼獲華夷之心，大副臣民之望。臣無任瞻天望聖，激切屏營之至。謹疏。

東塋老翁井齋僧疏

降授朝請大夫護軍賜紫金魚袋蘇轍。伏爲東塋老翁井，近歲以來，泉源耗竭，人失烹飪。田失灌種，先壠攸託，中情惕然。今因姪孫新授廣都主簿，元老西歸，謹請戒律僧就墳側晨設齋轉經，夜設水陸道場，以祈冥應。謹具疏如後。

齋僧七人，每僧各轉妙法蓮華經一部七卷，設水陸道場一夜。右伏以先君太子太師，北自東山，躬卜靈宅，泉出右麓，流於西南，旱暵不乾，霖潦不溢，實有常德，紀於耆舊。越自近歲，漸致枯竭，永惟良坎之德，行止相尋，山下出泉，在易爲蒙，蒙極必發，失其常性，厥咎在人。轍以愚暗，曩竊名位，積譴致罰，以累茲泉。今者歸依佛乘，救拔衆苦，伏願道場清淨，山神歡喜，泉流縈發，草木滋潤，居人蒙賜，塋域增固，伏乞三寶證知，稽首謹疏。

卷十九 青詞十一首

京師

臣久以空疏，預聞國政，上愧天地，下慙君父，常願冀私以徇公，捐身以濟物。而智有所不周，力有所不逮，事不稱心，十常三四，俯仰愧負，朝夕不忘，而復愚幼之年，過咎未免，長而知悔，往不可追。頃自十載以來，心存至道，清心寡欲，僅乃少完，浩如涉川，未知攸濟，敢以初生之日，仰祈真聖之恩，察其誠心，被以妙力，令臣所志獲遂，所學有成，國以永寧，身以長久，臣不勝大願，頓首頓首，謹詞。

高安四首

伏以生於微陋，性極冥頑，叨冒國恩，預聞政事，才短德薄，福過禍生，任意直前，不知罪譴之增積，終年三黜，遂涉江湖之嶮艱，手足之親，播遷瘴海，父子之愛，留寓中原，寄迹高安，遽逢生日，術者薦告，厄運稍移，仰叩天關，冀同聖造，矜其愚而多恕，察其中之無他，赦宥往愆，刊除罪籍，俾我同氣，俱復近邦，苟獲閑地，以偷安，非復要途之敢望，棲心澹泊，粗成止欲之因，畢老勤行，竊冀長年之幸，傾倒激切，不知所裁，臣無任瞻天竚懇，惶恐戰越之至，謹詞。

伏以臣夫婦歸誠至道，託迹塵寰，自幼至今，隨世所行，豈免過咎，况復近歲，預聞國事，福祿盈滿，功行萬聞，致此顛隲，復將誰咎？重以兄軾平生悻直，仇怨滿前，流竄海濱，日虞瘴癘，以至墳墓隔絕，父子分離，相望萬里，患不相救，今斥逐以來，薦歷寒暑，追惟既往，非有邪慝，患憂已深，理或當復，惟真聖慈閱，與物無私，庶幾北還，近獲成命，非復有心於榮遇，惟覬少獲於安全，憐其虛心養氣之勤，錫以問道逢師之幸，臣無任懇倒之至，謹詞。

伏以謫居高安，行將再歲，杜門自省，日懼禍災，乃者火焚閭閻，勢極熾猛，風從北來，正趨館舍，治任聖族，未

知所適；而風回火轉，幸免焚蕪，向非神祇明察，憐憫困窮，則雖免灰燼之虞，必有狼狽之患。敢陳菲供，少答靈貺，伏願稍垂慶祐，洗除宿殃，臣無任懇倒之至！謹詞。

伏念本鄉通義，以仕爲家，再謫高安，累年於此，以忠獲罪，夫婦漂流，攜家不前，男女離散，宿有疾疢，不甚康強，飽暖安閑，雖感恩於造物，拘縻窘通，常興嘆於異鄉，日屈初生，家陳薄供，望三清而稽首，仰衆聖以馳誠，稍同恩光，照此陷穿，願涉新歲，脫去宿殃，祿命增長，骨肉和合，悃悃誠意，莫敢盡宣，臣無任瞻天俟命，激切屏營之至！頓首頓首！謹詞。

龍川二首

伏念臣頃自甲戌之歲，大運在酉，命運相衝，是歲生日之後，自門下侍郎謫守汝州，爾後四經流竄，今在循州，嶮阻厄窮，何所不歷，疾疫喪禍，近復繼作，雖卯酉逆順，天理難逃，微生不幸，適丁其會，然術推陰命，先凶後吉，自始入運，今已七年，豈始迎其災，而終亡其吉？伏願俯念窮困，稍垂寬宥，覺悟朝廷，解釋羅網，骨肉安樂，相從北還，區區寸誠，願盡於此，臣無任懇倒之至！謹詞。

伏念臣始自甲戌得罪於朝，流竄南方，於今七載，再投嶺表，亦又三年，瘴毒所侵，骨肉凋喪，衣食所迫，囊橐空虛，脾肺冷洩，藥石不效，北歸無日，老而益窮，常懼寄死南荒，永隔鄉井，因上元之穀旦，依道士之靈科，稽首泥塗，歸命仙聖，一願養心煉氣，日見成功，積陰消散，真陽充滿，二願朝廷覺悟，羅網解脫，振衣北還，躬耕爲樂，三願南北眷屬，各保安寧，北歸之時，一一相見，臣已身心自善，屏去邪淫，等觀冤親，會加慈恕，遇有方便，知無不爲，或在廟堂，或在田野，並推此心，無有變易，天地鬼神，實聞此言，雖生成之恩，茲未能報，而螻蟻之志，死且不渝，臣無任懇倒之至！謹詞。